



SIARAN MEDIA

KEMENTERIAN BELIA DAN SUKAN



KBS : 90/2025

SIMPOSIUM INTEGRITI SUKAN DAN ANTI-DOPING ASEAN 2025

1. Kementerian Belia dan Sukan (KBS) melalui Agensi Anti-Doping Malaysia (ADAMAS) telah menganjurkan **2025 ASEAN Sports Integrity & Anti-Doping Symposium** sebagai salah satu **Program Pembangunan Belia dan Sukan** sempena Kepengerusian ASEAN Malaysia 2025.
2. Isu berkaitan integriti sukan bukan sekadar melibatkan pelanggaran peraturan, malah boleh menjejaskan intipati dan semangat kesukanan. Selain itu, pelanggaran integriti meningkatkan risiko terhadap kesihatan serta memberi implikasi yang luas terhadap persepsi sukan di peringkat global.
3. Sehubungan dengan itu, ekosistem sukan perlu dipelihara dengan penuh integriti melalui pewujudan persekitaran sukan bersih (*clean sport*) yang bebas daripada penggunaan bahan serta kaedah terlarang. Penganjuran program ini bertujuan memperkukuh agenda integriti sukan dan mempromosikan amalan sukan bersih di rantau ini.
4. Objektif penganjuran program adalah untuk:
 - a. membuktikan komitmen berterusan Malaysia sebagai sebuah negara yang sentiasa menyokong amalan budaya bersukan yang bersih dan adil, melalui kepatuhan anti-doping dan integriti sukan; dan
 - b. menyediakan platform latihan berbentuk teori dan praktikal di samping berkongsi ilmu dan penemuan terkini di dalam aspek anti-doping dan integriti sukan di rantau ASEAN dan peringkat antarabangsa.
5. Program ini dirasmikan oleh YBhg. Dato' Ts. Dr. Nagulendran Kangayatkarasu, Ketua Setiausaha, Kementerian Belia dan Sukan. Beliau juga telah menyampaikan ucap tama berkaitan anti-doping dan integriti sukan. Semasa ucapan beliau, beliau telah menggariskan bahawa KBS sedang dalam proses meminda Akta Pembangunan Sukan 1997 (Akta 576) antara lain untuk memasukan elemen anti-doping dan integriti sukan. Ini menunjukkan komitmen serius negara kepada perkara ini.

6. Selain itu program ASEAN ini juga telah melihat sesi perkongsian mengenai pelaksanaan World Anti-Doping Code dan International Standards 2027, pendidikan berasaskan nilai, pencegahan pengaturan perlawanan serta tadbir urus sukan.
7. Program ASEAN ini telah mendapat penyertaan wakil-wakil negara ASEAN, agensi persekutuan dan negeri, World Anti-Doping Agency (WADA), *Japan Anti-Doping Agency* (JADA), *Korea Anti-Doping Agency* (KADA), Sport Integrity Australia (SIA), Asian Football Confederation (AFC), Badminton World Federation (BWF), Suruhanjaya Pencegahan Rasuah Malaysia, Sekretariat ASEAN, Majlis Olimpik Malaysia, Majlis Paralimpik Malaysia dan persatuan-persatuan sukan antarabangsa serta kebangsaan

Untuk maklumat lanjut mengenai Simposium ini, sila hubungi Agensi Anti-Doping Malaysia (ADAMAS) di talian +603 88713527 | +6010 982 2905

**UNIT KOMUNIKASI KORPORAT
KEMENTERIAN BELIA DAN SUKAN (KBS)**

29 Oktober 2025